

令各官慢不舉行殊極非矣請給年例襦衣各一襲以遣 從之○戊寅夜坤
方有氣如火光○已卯 上御資政殿引見忠清道觀察使鄭廣敬平山府使
嚴愷 上問廣敬曰本道有何弊瘼云耶對曰竊聞號牌一事民不信或漏落
於名籍或流移於他地未成其頭緒云事目限以正月而此後無牌者則當置
重法脫漏者若多則必未及期以此為慮 上曰此是大段舉措不可尋常施
為也 上謂嚴愷曰本邑有山城國家倚重異於他邑器械糧餉爾其盡心措
置仍命各賜弓箭虎皮等物○上下教于備局及戶曹曰近日天氣漸寒邊土
必倍念惟西塞中夜無寐絕域孤城縱切敵愾之志離鄉去家寧禁懷歸之思
况又邊地玄冰凍餒難堪在我無恃危懼易生未及交鋒其苦如此為民父母
寧不惻然西邊苦戍將官照數分等各給衣資如段紬等物以表予意軍卒則
以納衣狗皮衣等均一分給使毋負朝廷至意備邊司回啓曰平安兵使以下
邊將及江邊八邑守令通共五十員堂上則段子白紬各一匹堂下則白紬二
匹令該曹下送而至於戍邊將官則令體察副使及兵使同議磨鍊以管餉所
儲段紬分等俵給何如 從之○宣惠廳以本廳所儲竭乏請寢長湍坡州高
陽等三官收米留儲備餉之令 上命限正月姑留本官○戶曹判書沈悅以